

Galicia Encantada



ANIVERSARIO
2005  2025
Enciclopedia de Fantasia Popular de Galicia

Micromitos

CATEGORÍAS RELACIONADAS

Micromitos 019: A Garavanceira

Segundo me comentou Belén Chao Ónega chámalle así a un coco que anda polo concello da Pastoriza. Ten figura de muller e aparécese nos camiños cegados de silvas e felgos polos que é case imposible o paso. O neno ou nena que entre alí arríscase a que a Garavanceira o pille e o meta nun saco para logo vendelo, quen sabe a quen e para que.

Existe unha variedade de silva chamada precisamente garavanceira, un máis dos nomes dun arbusto (*ruscus aculeatus*) de falsas follas espiñentas e froitos vermellos. Esta planta tamén se chama azoutacristos, brusco, mezquita, picanceira, silva macha, roseira silvestre, rascacú, silbarda, silvarda, xibarda, xilbarda e xarda (xardeira). Os meniños non deben comer os seus froitos xa que lles poden provocar vómitos, descomposición e convulsións.

Segundo E. Lence Santar, as bruxas da zona de Mondoñedo viaxan de a cabalo dunhas vasoiras feitas de xibarda ou garavanceira. Voan en parellas, collidas pola man, desde o Monte Monfadal ata o xuntoiro que teñen no Pico do Xistral a Noite de San Xoán todas as bruxas da Mariña e da Terra Chá.

«⇔»

Serie: *Micromitos* **Publicación:** *Nós Diario*, 25 de setembro de 2020.

Locución audio: *Rocío Romero Otero*

Your browser does not support the audio element.